

Date – 24/07/2025

Time - 7:30 -7:40Hrs
AKASHVANI AIZAWL

REGIONAL NEWS BULLETIN

HEADLINES (MORNING)

1. Sorkar chuan National Highway 6/306 that tawh loh avanga nitin mamawhah harsatna mipuite'n an tawh loh nan theihtawp a chhuah reng a ti.
2. Ni 3 awh tur Mara Autonomous District Council fur thutkhawm chu Siahaah neih mek a ni.
3. Prime Minister Narendra Modia chuan nizan khan London khawpui a thleng.
4. Kum 10 kalta chhungin ramchhunga electronic bungrua siamchhuah leh rampawna thawmchhuah nasa takin a pung.

<><><>

MOTDA

Food Civil Supplies & Consumer Affairs Dept chuan National Highway 6/306 that tawh loh avanga nitin mamawhah harsatna mipuite'n an tawh loh nan Sawrkar chuan theihtawp a chhuah reng a ti a,

Bungraw phur lirtheite'n harsatna an tawh mek leh pawl thenkhatte'n nawrh an huaihawt chungchang pawh enzui a ni a ti.

Kan corr report lo ngaithla ang.

Supply Department chuan Fulpui intan hmain ngawrh takin monsoon stocking a kalpui avangin buhfai sem kawngah harsatna a awm lo a ti a, tuialhthei pawh Supply Department-in report a dawn danin tun dinhmunah AMC area bikah stock tlema zawng a awm mek a. District dangah pawh District Administration-te hriatpuina hnuaiah stock vil chhunzawm reng a ni.

Hetiang a nih lai hian mipuite pawh mamawh ve dangte hre reng chung a oil mamawh lam khawm kawngah huamhauh fal awmlo turin Department chuan a ngen a. Mipuite'n harsatna an tawh loh nan Sorkarin theihtawp a chhuah mek zel a ni.

Hetihlai hian, Kawnpui leh Sairang inkar kawng chhia avanga an lirthei din tir mek Mizoram Oil Tanker Driver's Association (MOTDA) te chuan an lirthei an la din tir chhunzawm zel a.

Akashvani zawhna chhangin MOTDA President Pu Romel Lalruatdika chuan kawng thuam tha turin Mizoram sorkarin hma a la tan ni a an hriat thu leh NHIDCL lam pawhin kawng siamna lung te an chhekkhawl tana an hriat thu a sawi a. Hetihruah hian a hmun ngeiah naktuk emaw a tuk lehah emaw hnathawh hi an enfiah dawn a ti a. Hemi hnuah hian kawng thawm that a nih dan te thlir chungin an kal zel dan tur chu an la ngaihtuah leh dawn a ti.

Pu Romel Lalruatdika chuan a tir atanga an tum angin kawng laka tangkhang tuialhthei rawn phur sa tawh truck te chu dan an tum loh thu leh kawnga tang tlem azawngin tuialhthei an lo phurh luh thu a sawi a. Tun dinhmunah petrol pump ngei hmak tawh chu tlem azawng awm mahse heng lirthei lut tlem azawng leh stock lo neih avanga coupon chauha lak theih nei te leh petrol leh diesel lak tur la nei erawh tlem azawng an awm thu an sawi a ni.

<><><>

JCM

Kawnpui leh Sairang inkar kawngchhia chungchanga thuneitute darkar 48 nghaktu Joint Civil Society of Mizoram (JCM) hruaitute chuan sorkarin chet a la ta a an hriat avangin vawiin hian an enfiah dawn.

Akashvani News zawhna chhangin JCM Secretary Dr Vanlalsiama Chhangte chuan he thu hi a sawi a, JCM in sorkar an nghah mek laiin sorkar chuan kawng thawm that nan cheng nuai 100 te dahin kawng siam hna pawh an thawk tana an hriat thu a sawi a. A hmaa an lo sawilan hnatlanga siam chungchang pawh sorkarin chet a lak tak avangin a ngaih dawn leh dawn loh a hmun ngeia an enfiah dawn thu a sawi a ni.

VC of Vanlalruata

Puan tawh angin JCM hian tunkar Thawhtanni khan chanchinbumite kawmin tun thla ni 19 a Kawnpui leh Sairang inkar kawngpui enfiaha an kal tuma kawng dinhmun chhiat zia leh thuneitu hrang hrang - Ministry of Road Transport & Highways, NHIDCL leh Mizoram sorkar ten a rang lama tlan theiha an thawm that an phut thu an lo sawi tawh a. Darkar 48 chhung thuneitute an nghah dawn thu lo sawiin darkar 48 hi a ral ta a ni.

<><><>

NHIDCL ED TRANSFERED

NHIDCL Aizawl Regional Office-a Executive Director thawk lai Virendra Kumar Jakhar chu sawn a ni a, a thlaktu tur ruat a ni.

NHIDCL Aizawl Regional Office-a Executive Director thar ruatna hi tunkar Thawhlehnia tihchhuah NHIDCL Office Order lehkha tihchhuahah tarlan a ni a. Executive Director thar tura ruat hi Adelbert Susangi a ni.

Executive Director nilai, chawlh la mek Virendra Kumar Jakhar chu a leave tawp hunah NHIDCL Head Office-a in report tura tih a ni.

Puan tawh angin Thawhlehni khan Mizo Zirlai Pawl chuan chanchinbumite an kawmna ah Mizoram ei leh bar lakluhna kawngpui

pawimawh em em, kal hleihtheih loh khawpa chhiat laia Executive Director Virendra Kumar Jakhar in August ni 7 thlenga chawlh a la chu hriatthiam har an tih thu an lo sawi tawh a. Mizorama awm tlaka an ngaih loh bakah a deputation term a tawp tawh avangin a term pawhsei an remtihloh thu te, Mizorama lo let leh tawh lo tura an hriattir thu te an lo sawi tawh a ni.

<><><>

HORTI MINISTER

Horticulture Minister Pu. C Lalsawivunga hian nimin vek khan leh Hmunhmelthaa kudam, Collection Centre ni bawk a hawng a, Passionfruit Processing Unit, Cold Storage Complex, New Champhai a sak mek te, Tlamsam Turmeric Processsing Unit, Farmgate Agro Processing Pvt. Ltd. ten an enkawl mek te leh Tlamsam a Champhai Winery a tlawh bawk a ni.

Minister Pu C. Lalsawivunga chuan heng project sak zawh tak te kuthnathawktute'n an tangkai pui ngei nan duhsakna a hlan a, department hotute tha taka thawhpuia tanpui turin a chah bawk a ni.

Champhai Winery a tlawnhaah thu sawiin kuthnathawktute tan sawrkar hi a ding zel a ni a ti a, Mizoram tihmasawntu an ni thei tih sawiin rinawmna leh dikna vawng tlata hna thawk turin a fuih a ni. Project sak mek te chu Champhai Bawrhsap Pu Mohammad Aaquib nen enin hmalak zel dan tur te an sawi bawk. Minister chuan a hmun tlawnhaa hnathawh dan te enin, sawhthing khawl hmanga an sawngbawl dan te, solar drying an hman dan te, winery-a an thawh dan te leh an thiltih hrang hrang a enpui a ni.

Horticulture Complex-a project hi NABARD hnuaia sak niin he project atan hian cheng nuai 114.64 hman a ni a, he collection centre-ah hian metric tonne 210 leng tura ngaih a ni.

<><><>

PASSION FRUIT

MIDH Special Intervention hnuaia Sapthei chin khuhhawanna chu nimin khan Horticulture Minister Pu C. Lalsawivunga hova neih a ni a, Horticulture Department Director Pu C.H. Lalmuanpuia'n hun a kaihruai a ni.

Pu C. Lalsawivunga chuan thusawiin sorkarin kut hnathawktute a ngai pawimawh hle a, kut hnathawktute intodelhna atana hmalakna tangkai tak a nih a beisei a ti. Kut hnathawktute chu fuihin, ramin harsatna a tawh mek sual hrang hrang laka inthiarfihlim a, ram a lo din chhuahna tura thahnem ngai taka hnathawka thlai thar tam tak thar chhuak turin duhsakna a hlan a ni. Minister chuan kut hnathawktute hnenah MIDH Special Intervention hnuaia hamthatna te a sem bawk a ni.

Sapthei chin khuhhawnaah hian hian KVIB Charman Pu C. Lalremliana leh MIFCO Chairman Pu Lalthazuala Rawite te'n thu an sawi bawk a, DHO Pi

Lalrinchhani'n lawthu sawiin hun a khar a ni. Champhai Bawrhsap Pu Mohammad Aaquib, Sorkar official te leh kuthnathawktu te an tel bawk a ni.

Ramchhung State danga chin tam loh Sapthei hi Mizoram leilung, sik leh sa nen inmil tak a nih avangin District thlan bik Aizawl, Serchhip, Khawzawl leh Champhai ah te Sorkar chuan Sapthei chin kawngah nasa takin hma a la mek a. Champhai leh a chhehvel hi a zo boruak a ngeih avangin tun hma atangin sapthei hi chin thin a ni a, tunah hian MIDH Special Intervention hmangin Horticulture Department chuan khaw thlan bik - Vaphai, Samthang, Hnahlan, Ngur, Champhai, Hmunhmeltha leh Ruantlangah te hma lak pui turin chhungkaw 150 thlang chhuakin hma an lakpui mek a ni.

Heibakah hian, Champhai chhehvela sapthei tharte sawngbawlina turin Passion fruit Processing Unit, Cold Storage Complex under NEC Zote daiah sak peih tawh a ni a, a khawl leh hmanraw tul dangte dah turin buaipui mek a ni bawk.

<><><>

MADC SESSION

Ni 3 awh tur Mara Autonomous District Council fur thutkhawm chu nimin khan tan a ni a,

Chairman Pu N.Viakhu kaihhruai session ah hian zawhna house chhunga chhan chi 17 a lut a, bill 2 - The Mara Autonomous District Council (Non Agriculture Land Settlement) (Third Amendment) Bill, 2025 leh The Mara Autonomous District Council (Agriculture Land Settlement) (First Amendment) Bill, 2025 te bakah Rules chi hrang hrang 4 sawiho a pass tum a ni.

Tuntum session ah hian dam lohna vangin member 5 Pu Nahlo solo, Pu Hc. Biakcheuva, Pu Tiahlei Syhlo, Pu TA. James Riatha leh Pu Delson Notlia te chu an tel thei lo a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

PM

Prime Minister Narendra Modia chuan nizan khan London khawpui a thleng a. UK-a a chamchhung hian UK PM Keir Starmer nen an inkawm dawn a. King Charles III na an inkawm bawk ang. Ram pahnih inkara thawhdunna hrang hrang bakah Free Trade Agreement FTA chuangchangte an sawi dawn a ni.

Prime Minister Modi leh UK PM Keir Starmer te hi tum hnih an lo inkawm tawh a. Kum 2024 November thla khan G20 Summit Brazil leh kum 2025 June thlaa G7 Summit ahte an lo inkawm tawh a ni.

<><><>

ELECTRONIC

Kum 10 kalta chhungin ramchhunga electronic bungrua siamchhuah leh rampawna thawnchhuah nasa takin a pung. Union Minister of State for Electronics and Information Technology Jitin Prasada'n Lok Sabha-a ziaka zawhna chhangin he thu hi a tarlang a. Nikum sawrkar tangka kumah khan electronic bungrua siamchhuah hi cheng vaibelchhe nuai 11 chuang hu a ni tih a sawi a. Kum 2014-15 a cheng vaibelchhe nuai 1 sing 9 nena khaikhinin a let 6 lain a pung a ni a ti. Kum 10 kalta chung vekin rampawna electronic bungraw thanwchhuah hi cheng vaibelchhe nuai 3 leh sing 2 sang 7 hu anih thu sawiin mobile phone thawnchhuah chu a let 127 a pungin cheng vaibelchhe nuai 2 hu a tling a ti bawk.

<><><>

UNION SPORTS MINISTER

Union Minister for Youth Affairs and Sports Mansukh Mandaviya chuan Lok Sabha-a bill pahnih National Sports Governance Bill,2025 leh National Anti-Doping (Amendment) Bill.2025 te a pulut. Pu Mandaviya chuan Sports Governance Bill chu ramchhunga infiamna tihhmasawn leh tihlarna tur anih thu tarlangin infiammite hamthatna siambelh leh sawrkar lam atanga inrelbawlna tha neihna tur anih thu a sawi a ni.

<><><>

PM MANN KI BAAT

Prime Minister Narendra Modi chuan Pathianni chawhma dar 11 hian 'Mann Ki Baat' programme-ah ram chung leh ram pawn mipuite hnenah thu a sawi leh dawn a, Tun tum ami hi a tum 123-na tur a ni ang.

He programme hi Akashvani leh Doordarshan network pumpui, AIR News website leh Newsonair mobile app-ah te tihchhuah a ni ang a, AIR News, DD News, PMO, leh Information and Broadcasting Ministry-a YouTube channel-ah live-stream a ni bawk ang.

<><><>